

ADYAYA I

PURWAKA

1.1 Dadalan Pikobet

Pendidikan pinaka sarana sane pinih riin ring kauripan sane kaangen para jadma ngelaksanayang peplajahan. *Pendidikan* sane utama kapolihang inggih punika ring kaluwarga, ring sekolah, miwah ring krama. *Pendidikan* becik tur patut, ngemetuang para jadma sane mautama tur pinih becik. Lianan sakadi punika, pendidikan ngewetuang lan ngelimbakang *karakter* wangsa, mangdane ngemolihang jadma sane mautama sane becik tur mabuat ring kauripan. Pamargin *pendidikan* mangdane ngamolihan napi sane kaaptiang, patut nguratiang uger-uger sane kaanggen pratiwimba ngamargiang peplajahan. Maosang indik uger-uger, basa Bali sampun ketah kawentenan uger-uger saking pemerintah indik basa Daerah. Sakadi sane sampun kasurat ring Undang-undang Nomor 57 Tahun 2014 BAB II maosang indik "*kedudukan dan fungsi bahasa*", ring pasal 6 ayat 2 nlatarang indik; "(1) *Sarana komunikasi dalam keluarga dan masyarakat daerah*, (2) *Bahasa media massa lokal*, (3) *Sarana pendukung Bahasa Indonesia*, dan (4) *Sumber pengembangan Bahasa Indonesia*". Kawentenan awig-awig punika nujonin yening basa daerah puniki sampun kacumpu rumasuk ring ranah lokal,

santukan basa daerah madue ceciren yening *ragam* budaya Indonesia akeh kewentenannyane. Yening paiketan sareng *pendidikan* ngelimbakang kaweruhan sisia, sepatutne guru ngicenin galah majeng sisia antuk ngeresepang *kompetensi* pinaka piranti sane mabuat ring kauripan mangkin miwah sane jagi rauh. *Pendidikan* sane sayan ngelimbak ngeranayang magentos tata cara guru ri tatkala ngicenin peplajahan. Pateh taler sakadi peplajahan, ring wewidangan paguron-guron pastika setata mapaiketan sareng peplajahan sane pacang kamargian.

Maosang indik peplajahan, guru sepatutne nganggen *model* peplajahan sane patut ri tatkala ngemargian peplajahan sane nganutin pawatekan sisia mangdane para sisia dangan ngeresepang materi sane kaicen olih guru lan pemargi peplajahan ring kelas prasida aktif. Indike punika anut sareng penampen Nana Sudiana (2005:76) ngambil *model* peplajahan sane becik kaanggen olih guru ritatkala ngelaksanayang peplajahan mangdane *interaksi* saking guru sareng sisia ri tatkala peplajahan kamargiang. Nika sane mawinan yening nganggen *model* peplajahan sane becik lan patut pastika sisia punika mresidayang *aktif* ri kala nyarengin peplajahan. Santukan soang-soang sisia madue kaweruhan malianan ri tatkala ngeresepang materi peplajahan.

Ngawigunayang *model* peplajahan sane patut dereng tatas kauratiang olih guru. Manut pikolih pratiyaksa ring sekolah SMA Negeri 2 Tabanan, kacingakin saking sisia ri tatkala nyarengin peplajahan basa Bali kanton kimud, melid, tur meweh ngresopang peplajahannyane. Nika mawinan nilai basa Bali sisianyane kanton alit nenten nganutin sakadi sepat sida. Yening kacingakin ring kurikulum 2013 sane nuntutang mangda sisia sane nyarengin peplajahan prasida aktif ring kelas. Nenten sisia kemanten, guru mangdane ngawigunayang *model*

peplajahan sane *inovatif*, krana guru basa Bali irika wantah nganggen *model* peplajahan siki kemanten sakadi *model* ceramah (*lecture method*) ri tatkala ngamargiang peplajahan. Santukan guru durung midep ring ngawigunayang *model* sane lianan. Lianan ring punika pihkayunan sisia kanton kirang sareng peplajahan basa Bali. Mangdane nenten akeh sisia sakadi punika, guru patut nentuang *model* peplajahan sane becik tur anut ri tatkala ngicenin peplajahan basa Bali.

Model peplajahan sane patut prasida kaanggen nganutin panglimbak sareng sisia mangdane kayun malajah. Guru pastika makarya pangrencana lan nglaksanayang peplajahan ring sekolah mangda anut ring tetujon peplajahan. Punika taler guru patut nyingakin sapunapi pikenoh sane prasida kapolihang saking *media* utawi sarana rikala nglaksanayang peplajahan ring kelas, silih sinunggil ring peplajahan basa Bali. Ajahan-ajahan puniki mangda prasida kawigunayang ri sajeroing kauripan sisia. Dadosnyane ngemolihan peplajahan dahat mautama ring kauripan. Pangawitnyane, tetujon nentuang *model* peplajahan sane *inovatif* mangda kawentenan peplajahan ring kelas prasida *aktif* lan sisia ngrasayang seneng tur tetujon peplajahan punika prasida nemuning kasidan.

Peplajahan basa Bali akeh pisan ngenenin indik peplajahan basa, sastra, lan aksara. Saluir basa wewidangan peplajahan ring semester genap. Sane pikayunan ring peplajahan sastra inggih punika peplajahan paribasa Bali. Ring silabus semester genap kelas X *Kompetensi Dasar* peplajahan paribasa Bali inggih punika "*Mengaplikasikan Paribasa Bali (cecimpedan, wewangsalan, bebladbadan) dalam wacana atau komunikasi*" miwah "*Memproduksi wacana singkat menggunakan paribasa Bali secara lisan ataupun tulisan*". Cecimpedan

indik soroh basa sane kaangen matebag-tebagan, yening ring basa Indonesia pateh sakadi *teka-teki*. Wewangsalan punika lelampahan saparisolah kalih kahanan jadma, yening ring basa Indonesia pateh sakadi *tamsil*. Yening bebladbadan kawangun antuk lengkara utawi kruna tiga palet, artosnyane sakadi tutur jati sane sampun kalampahan riin.

Punika mawinan tata cara nyinahang kawigunan saking paribasa Bali pantaraning nganggen sesimbing waras madue tata krama, pabesen, punika taler malarapan antuk gegonjakan. Sakewanten samian punika madasar antuk guna sarat pabesen utawi ajah-ajahan ring paribasa Bali punika (Tinggen, 1988: 7). Taler wenten malih manut W. Simpen AB. (1993:6) nguningayang basita paribasa pinaka basa rinengga dados rerasmen wiadin panglengut basa rikala mababaosan tur kalih magegonjakan. Dadosnyane, paribasa Bali punika kaanggen panglengut basa mangda anake sane mireng punika seneng miwah paribasa Bali prasida kaanggen dasar ri tatkala mababaosan ngamargiang kauripan, miwah kaanggen ring sesuratan kria sastra. Ring materi paribasa Bali puniki anut pisan ngemargian peplajahan nganggen *model* peplajahan sane *inovatif* inggih punika *model* peplajahan *Problem Based Learning (PBL)*.

Model PBL prasida kanggen ring peplajahan paribasa Bali, santukan peplajahan punika prasida ngicenin sisia kaweruhan indik ngawigunayang paribasa nganutin saluir natasin pikobet-pikobet sane kapolihang. Manut Arends (Bekti Wulandari (2013:180)) *PBL* utawi *PBM* inggih punika ngawigunayang pikobet kadadosang inti ring piranti peplajahan *model PBL* puniki. Pikobet-pikobet punika kasayagaang dados *stimulus* peplajahan majeng para sisia utamanyane ring kelas X MIPA 2 SMA Negeri 2 Tabanan. Peplajahan punika

kalaksanayang nganggen situasi natin pikobet, guru pinaka *fasilitator* utawi memonitor pamargi diskusi punika. Dados kacutetang yening PBL inggih punika peplajahan sane ngicenin sisia pikobet-pikobet sane *praktis* dados kaweruhan ri tatkala malajah.

Malarapan antuk punika, pinih riin *peranan strategi* peplajahan punika prasida kabaosang mapikolih ring *proses* peplajahan sane ngeranayang panilik jagi ngelaksanayang tetilikan ring SMA Negeri 2 Tabanan sane nganggen materi paribasa Bali. Panilik taler sampun polih *observasi* sareng guru bahasa Bali ring SMA Negeri 2 Tabanan, sampun nyengakin yening peplajahan ring guru drika durung nganggen *model* sane kreatif sakadi PBL puniki, ring sekolah punika wantah nganggen *model ceramah (lecture method)*. Punika sane ngeranayang materi punika meweh katrima olih sisia santukan peplajahannyane ngemedin taler akeh sorohnyane. Peplajahan paribasa Bali akeh pisan nuturang indik kauripan ring guminyane, buron, miwah jadma sane prasida mapaiketan ring peplajahan paribasa Bali sareng geginan ring kahuripan.

Malarapan antuk punika, guru miwah sisia mangda kaaptiang prasida ngamargiang materi paribasa Bali puniki sayan becik. Sane mawinang panilik jagi ngelaksanayang panilikan ring SMA Negeri 2 Tabanan krana sekolah puniki lumbrahnyane sampun nganggen peplajahan sane *inovatif* sakewanten durung nganggen *model* peplajahan *Problem Based Learning (PBL)*, nika sane mawinang panilik jagi ngelaksanayang tetilikan irika. Panilik puniki sampun mresidayang paiketan (*kerjasama*) sareng guru drika, dadosnyane sadurung nyusun tetilikan puniki, panilik sampun polih observasi ring sekolah punika lan sareng guru-guru basa Bali sane wenten ring sekolah punika.

Tetilikan asoroh sane nganggen materi paribasa Bali sampun naenin kalaksanayang olih panilik sane lianan, wenten saking Ni Putu Rustiana Dewi (2017) ngelaksanayang tetilikan sane inggih punika "*Pemertahanan Kearifan Lokal Basita Paribasa Ring Tembang Pop Bali (Pupulan Tembang Hits Saking Dek Ulik)*". Tetilikan puniki nyutetang indik nureksain paribasa Bali sane wenten ring tembang lagu pop Bali saking Dek Ulik. Sane ngebinayang sareng tetilikan sane pacang kamargiang inggih punika, tetilikan puniki nganggen soroh tetilikan murni sane nganalisis tembang pop Bali. Sane kapolihang saking penelitian puniki indik kawentenan lagu pop Bali saking pupulan tembang hits Dek Ulik punika kaanggen ngajegang paribasa Bali antuk pemertahanan kearifan lokal. Wenten malih olih Ni Putu Pande Mirah Sri Erlina (2021) ngelaksanayang tetilikan sane mamurda "*Media Audio Visual Kanggen Nincapang Kawagedan Paribasa Bali Antuk Gending Pop Bali Sisia Kelas VIII E SMP Negeri 1 Tabanan Warsa 2021*". Tetilikan puniki nyutetang indik kawigunayang audio visual sane anggen nilikin paribasa Bali sane wenten saking lagu pop Bali. Sane ngebinayang ring tetilikan puniki *fokus* sareng *media* peplajahan, peplajahan paribasa prasida nincap yening nganggen *media* sane menarik lan model sane *inovatif*. Tetilikan puniki ngamolihang sakadi kaweruhan sisia sane sayan ngebecikan indik nilai ring peplajahan basa Bali utamanyane ring paribasa Bali. Lianan sakadi asapunika kaweruhan guru sane uning tur prasida ngawigunayang *media* sane kaanggen sarana ritatkala ngajahin ring kelas. Dados kacutetang yening kalih tetilikan punika sami pateh nganggen paribasa Bali sane kaanggen sarana tetilikan. Taler kaweruhan sisia lan krama indik paribasa Bali prasida kalestariang miwah sayan

nincap ring padewekan. Saking tetilikan samian punika mabinayan ring artos lan ring tingkatannyane.

Madasar antuk dadalan pikobet punika, panilik meled ngamargiang tetilikan antuk *model Problem Based Learning (PBL)* ring peplajahan paribasa Bali ring sisia kelas X MIPA 2 SMA Negeri 2 Tabanan. Nika mawinan panilik ngambil tetilikan sane mamurda "**Nincapang Kawagedan Paribasa Bali Nganggen Model Problem Based Learning (PBL) Sisia Kelas X MIPA 2 SMA Negeri 2 Tabanan**". Panilik ngaptiang sisia miwah guru prasida ngemargian strategi PBL puniki, mangdane sisia punika sayan waged melajah ring kelas utamanyane ring peplajahan paribasa Bali.

1.2 Ngrereh Pikobet

Kacingakin saking dadalan pikobet sane sampun prasida katlatarang, sajeroning tetilikan puniki sane pacang kalaksanayang panilik ngrereh pikobet sane sampun katlatarang. Pikobet sane kapolihang punika ngenenin indik paribasa Bali sane meweh pisan antuk ngeresep ring peplajahan paribasa Bali. Pikobet sane kapolihang minakadi : (1) Sisia kanton kirang ngresepang tur meweh malajahin indik peplajahan paribasa Bali ring materi punika, dadosnyane ritatakala sisia ngresepang peplajahan paribasa Bali nenten prasida karesepang becik. (2) Guru durung polih nganggen *model* peplajahan sane *inovatif*, mangda sisia prasida ngresepang materi paribasa Bali, (3) Santukan guru durung prasida ngicen peplajahan paribasa Bali sane mapaiketan sareng palemahan sisia, dadosnyane peplajahan sane kamargiang durung nyata sareng ring palemahan, (4) Sapunapi *implementasi* model PBL puniki kaanggen olih sisia kelas X MIPA 2 SMA Negeri 2 Tabanan.

1.3 Ngwatesin Pikobet Tetilikan

Ri sajeroning kawentenan tetilikan puniki sane pacang kalaksanayang, panilik jagi nureksain miwah ngwatesin malih pikobet sane sampun karerehan olih panilik. Pikobet punika mangda prasida kawatesin olih panilik taler paripurnayang ri sajeroning nepasin pikobet tetilikanyane. Lianan sakadi asapunika, pikobet prasida kawatesin antuk makudang-kudang parindikan minakadi kabanda antuk galah lan ngicenin peluang majeng ring panilik siosan mangda nyangkepin ri tatkala ngamargiang tetilikan manut kaweruhan widya sane lianan. Pikobet sane pacang kawatesin olih panilik inggih punika (1) Pidabdab indik nincapang nilai sisia ring peplajahan paribasa Bali nganggen *model Problem Based Learning (PBL)*. (2) Pidabdab indik *model, model* sane kaanggen *model Problem Based Learning (PBL)*. (3) Pidabdab indik penampen saking sisia kelas X MIPA 2 SMA Negeri 2 Tabanan, krana sisia ring kelas punika nilainya kanton kirang lan kimud malajah basa Bali, utamanyane ring peplajahan paribasa Bali.

1.4 Bantang Pikobet Tetilikan

Manut dadalan pikobet sampun katlatarang, bantang pikobet sane prasida kapolihang inggih punika:

1. Sapunapi tata cara nincapang kawagedan paribasa Bali nganggen *model Problem Based Learning (PBL)* ring sisia kelas X MIPA 2 SMA Negeri 2 Tabanan?
2. Napikeh *model Problem Based Learning (PBL)* prasida kaanggen nincapang kawagedan paribasa Bali ring sisia kelas X MIPA 2 SMA Negeri 2 Tabanan?

3. Sapunapi indik penampenan siswa kelas X MIPA 2 SMA Negeri 2 Tabanan ring kawentenan *model Problem Based Learning (PBL)* kaangen nincapang kawagedan paribasa Bali?

1.5 Tetujon Tetilikan

Kacingakin antuk bantang pikobet sane sampun karincikang punika, tetujon tetilikan puniki inggih punika:

1. Mangdane prasida nlatarang sapunapi tata cara nincapang kawagedan paribasa Bali nganggen *model Problem Based Learning (PBL)* ring siswa kelas X MIPA 2 SMA Negeri 2 Tabanan.
2. Mangdane prasida uning napiké *model Problem Based Learning (PBL)* prasida kaangen nincapang kawagedan paribasa Bali ring siswa kelas X MIPA 2 SMA Negeri 2 Tabanan.
3. Mangda prasida uning sapunapi indik penampenan siswa kelas X MIPA 2 SMA Negeri 2 Tabanan ring kawentenan *model Problem Based Learning (PBL)* kaangen nincapang kawagedan paribasa Bali.

1.6 Kawigunan Tetilikan

Pikolih saking tetilikan sane pacang kalaksanayang puniki, kaaptiang pisan mangda prasida mawiguna. Kawigunan saking tetilikan puniki katelatarang sakadi ring sor.

1.6.1 Kawigunan Pamucuk

Manut kawigunan teoritis, pikolih saking tetilik puniki kaaptiang mangda prasida nincapang kaweruhan utamanyane ring wewidangan paribasa Bali. Punika taler mangda prasida dados ajah-ajahan sane mawiguna ring sajeroning panglimbak basa sinalih tunggilnyane paribasa Bali tur siswa prasida

kresep ring sajeroning pamargi peplajahan, cutetnyane ring peplajahan basa Bali. Lianan sakadi asapunika, kawentenan tetilikan sane nganggen *model Problem Based Learning (PBL)* puniki ngicenin pangarah-arang majeng guru miwah panilik sane tiosan kaanggen sasuluh ri tatkala ngamargiang peplajahan ring kelas.

1.6.2 Kawigunan Panglimbak (*Praktis*)

Kawentenan kawigunan panglimbak, matetujon mangda mawiguna majeng ring sekolah, majeng ring guru, majeng ring sisia, miwah majeng ring panilik sane lianan. Kawigunan panglimbak ring tetilikan puniki katlatarang ring sor:

a. Majeng ring Sekolah

Mangdane kawentenan tetilikan puniki mangda dados pinaka sesuluh sane kaangen ring sekolah ri tatkala nglaksanayang kramaning peplajahan sane becik kalaksanayang anggen nincapang sapunapi kapatutan peplajahan, utamanyane saking peplajahan paribasa Bali.

b. Majeng ring Guru

Ri sajeroning kawentenan tetilikan puniki kaaptiang prasida ngwantu guru minakadi guru Basa Bali sane wenten ring SMA Negeri 2 Tabanan anggen nincapang kaweruhanyane tat kalaning ngangge *model* ri tatkala ngajahin peplajahan paribasa Bali.

c. Majeng ring Sisia

Sajeroning kawentenan tetilikan puniki kaaptiang mangda sisia samian prasida dangan ngresepang daging peplajahan nganggen *model* peplajahan sane kamargiang. Punika malih mangdane sisia-sisia samian prasida akeh malajahin *model-model* peplajahan *inovatif*.

d. Majeng ring Panilik Sane Lianan

Mangda prasida ngwantu anggen rerawatan majeng ring panilik salanturnyane antuk ngaryanin tetilikan. Prasida kaaptiang, anggen dasar sasuluh olih panilik lianan kaangen nyandingan tetilikannyane mangda ngamolihan tetilikan sane becik, patut, tur mawiguna ring tetilikannyane.

